



Na osnovu člana 22 Statuta Brčko distrikta BiH (Službeni glasnik Brčko distrikta BiH, broj 17/08), člana 64 Poslovnika o radu Skupštine Brčko distrikta BiH (Službeni glasnik Brčko distrikta BiH, broj 17/08), i Prijedloga odluke Fonda zdravstvenog osiguranja Brčko distrikta BiH broj: 015-180/7-54/09 od 2. jula 2009. godine, Skupština Brčko distrikta BiH, na 18. redovnoj sjednici održanoj 16. decembra 2009. godine, donosi

## **ODLUKU**

### **O OSNOVICI I STOPI DOPRINOSA ZA ZDRAVSTVENO OSIGURANJE**

#### **Član 1**

##### **(Predmet odluke)**

Ovom odlukom utvrđuju se:

- a) vrste doprinosa,
- b) obveznici doprinosa,
- c) osnovice doprinosa,
- d) stope doprinosa.

#### **Član 2**

##### **(Doprinosi)**

(1) Doprinosi iz člana 1 ove odluke su prihod Fonda zdravstvenog osiguranja Brčko distrikta BiH (u daljnjem tekstu: Fond).

(2) Doprinosi se obračunavaju i plaćaju:

- a) iz ličnih primanja i drugih prihoda osiguranika;
- b) iz drugih izvora utvrđenih ovom odlukom.

#### **Član 3**

##### **(Obveznici obračuna i uplate doprinosa)**

(1) Obveznici obračuna i uplate doprinosa i sredstava za provođenje obaveznog zdravstvenog osiguranja su:

- a) preduzeća i druga pravna i fizička lica, koja obavljaju privrednu i neprivrednu djelatnost, za svoje zaposlene, nezavisno od toga da li se radi o domaćim ili stranim radnicima, u javnom ili privatnom sektoru, profitnom ili neprofitnom;
- b) samozaposlena lica, sama za sebe;
- c) poljoprivrednici sami za sebe i za članove svoje porodice, ukoliko nisu osigurani po drugom osnovu;
- d) lica zaposlena u inostranstvu, za članove svojih porodica koje žive na prostoru Brčko distrikta BiH, ako nisu osigurana po nekom drugom osnovu, što je regulisano međudržavnim sporazumima o socijalnom osiguranju;
- e) fond penzijsko-invalidskog osiguranja, za korisnike penzija i korisnike drugih prava po osnovu penzijsko-invalidskog osiguranja;

- f) nadležni organ za pitanja boraca, za lica kojima je priznat status vojnog, mirnodopskog ili civilnog invalida rata, za korisnike porodične invalidnine ako nisu osigurani po drugom osnovu;
- g) nadležni organ za policijske službenike, vatrogasce i deminere;
- h) studentske i omladinske zadruge, za lica koja su angažovana na povremenim poslovima za slučaj povrede na radu ili profesionalnog oboljenja, ako nisu osigurana po nekom drugom osnovu;
- i) nadležni organ uprave Brčko distrikta BiH, za lica u stanju socijalne potrebe;
- j) nadležni organ uprave Brčko distrikta BiH za učenike / studente koji nisu osigurani po drugom osnovu i za učenike / studente koji obavljaju pripravnički staž koji je vezan za njihovo školovanje;
- k) Zavod za zapošljavanje, za lica koja su registrovana u Zavodu za zapošljavanje, ako nisu osigurana po drugom osnovu, u skladu s propisima iz oblasti zapošljavanja u Brčko distriktu BiH;
- l) autorske agencije, udruženja građana, druga profesionalna i sportska udruženja, organizatori sportskih i drugih javnih manifestacija, za učesnike tih manifestacija, za članove njihovih udruženja koja se bave profesionalnom ili drugom djelatnošću kojom ostvaruju prihode, za vrhunske sportiste koje kao takve rangira Sportski savez Brčko distrikta BiH ili Olimpijski komitet BiH, ako nisu osigurani po drugom osnovu;
- m) lica koja imaju privremeno boravište i rade u Brčko distriktu BiH, a zaposlena su kod stranog poslodavca i nemaju osiguranje kod stranog fonda zdravstvenog osiguranja ili druge ustanove nadležne za realizaciju zdravstvenog osiguranja;
- n) lice koje je na teritoriji Brčko distrikta BiH zaposleno kod pravnog ili fizičkog lica kao što je međunarodna organizacija i ustanova ili strano diplomatsko ili konzularno predstavništvo, ako međunarodnim ugovorom nije drugačije određeno;
- o) druga lica u skladu s propisima iz oblasti zdravstvenog osiguranja.

(2) Obveznici obračunavanja i uplate doprinosa za dobrovoljno zdravstveno osiguranje su lica koja nisu obuhvaćena stavom 1 ovog člana i doprinos uplaćuju dobrovoljno, sama za sebe.

(3) Doprinosu za lica iz tački i), j), k) i o) stava 1 ovog člana uplaćuje nadležni organ uprave Brčko distrikta BiH po propisanoj osnovici i stopi iz ove odluke.

(4) Nadležni organ uprave Brčko distrikta BiH uplaćuje doprinose za lica iz tački e) i f) stava 1 ovog člana ukoliko:

- a) nadležni entitetski organi ne uplaćuju doprinose u skladu s propisima entiteta iz oblasti doprinosa;
- b) nadležni entitetski organi uplaćuju doprinose u iznosu manjem od iznosa predviđenog propisima entiteta iz oblasti doprinosa.

(5) U slučaju iz tačke b) stava 4 ovog člana, nadležni organ uprave Brčko distrikta BiH uplaćuje doprinose koji predstavljaju razliku između iznosa uplaćenog na ime doprinosa i punog iznosa doprinosa propisanog propisima entiteta.

#### **Član 4**

##### **(Osnovica za obračun i uplatu doprinosa)**

Osnovica za obračun i uplatu doprinosa iz člana 1 ove odluke je:

- a) bruto plata i naknada i ostala primanja na koja se plaća porez na lična primanja – za lica iz člana 3, stava 1, tački a), b), g), l), m) i n) ove odluke;
- b) neto isplata – za lica iz člana 3, stava 1, tačke h) ove odluke;

- c) 55% od prosječne bruto plate u godini koja prethodi godini u kojoj se vrši obračun, objavljene od Službe za statistiku Brčko distrikta BiH, za lica iz člana 3, stava 1, tački i), j), k) i o) ove odluke;
- d) 55% od prosječne bruto plate u godini koja prethodi godini u kojoj se vrši obračun, objavljene od Službe za statistiku Brčko distrikta BiH, za lica iz člana 3, stava 2 ove odluke;
- e) 55% od prosječne bruto plate u godini koja prethodi godini u kojoj se vrši obračun, objavljene od Službe za statistiku Brčko distrikta BiH, za lica iz člana 3, stava 1, tačke c) ove odluke.

## **Član 5** **(Stopa doprinosa)**

Stope doprinosa na osnovice utvrđene članom 4 ove odluke su:

- a) 12% na osnovicu iz člana 4, tačke a) ove odluke;
- b) 2% na osnovicu iz člana 4, tačke b) ove odluke;
- c) 9% na osnovicu iz člana 4, tačke d) ove odluke;
- d) 9% na osnovicu iz člana 4, tačke c) ove odluke, za lica iz člana 3, stava 1, tački j), k) i o) ove odluke;
- e) 7% na osnovicu iz člana 4, tačke c) ove odluke za lica iz člana 3, stava 1, tačke i) ove odluke;
- f) 5% na osnovicu iz člana 4, tačke e) ove odluke.

## **Član 6** **(Najniža osnovica)**

(1) Najniža osnovica za obračun i uplatu doprinosa iz člana 4, tačke a) ove odluke je minimalna osnovica na koju se obračunava doprinos za penzijsko-invalidsko osiguranje u skladu s propisima entiteta, do donošenja kolektivnog ugovora u Brčko distriktu BiH.

(2) Danom donošenja kolektivnog ugovora iz stava 1 ovog člana, prestaju da se primjenjuju propisi entiteta kojima se određuje najniža osnovica.

## **Član 7** **(Vrijeme uplate doprinosa)**

(1) Doprinos iz člana 4, tačke a) ove odluke, obračunava se i uplaćuje na dan kada se vrši obračun primanja.

(2) Doprinos iz člana 4, tačke b) ove odluke, obračunava se i uplaćuje do petnaestog dana u mjesecu za prethodni mjesec.

(3) Doprinos iz člana 4, tački c), d) i e) ove odluke, obračunava se i uplaćuje na jedan od sljedećih načina:

- a) mjesečno,
- b) kvartalno,
- c) polugodišnje,
- d) godišnje.

(4) Vrijeme uplate doprinosa iz člana 4, tački d) i e) ove odluke, prethodi periodu osiguranja za koji se doprinos uplaćuje.

**Član 8**  
**(Uplata doprinosa)**

(1) Doprinosi za zdravstveno osiguranje se uplaćuju na račun Fonda zdravstvenog osiguranja Brčko distrikta BiH, u skladu s Odlukom o uplatnim računima prihoda budžeta i fondova Brčko distrikta BiH, načinu uplaćivanja tih prihoda i načinu i rokovima izvještavanja korisnika prihoda.

(2) Obveznik uplate doprinosa iz ove odluke dužan je da doprinose uplaćuje redovno, od datuma prijave na zdravstveno osiguranje, do datuma odjave.

(3) Obveznik uplate doprinosa iz ove odluke, koji prekine uplatu doprinosa dužan je da izvrši uplatu doprinosa od datuma prijave na zdravstveno osiguranje do datuma odjave, odnosno da obezbijedi kontinuitet uplate doprinosa.

**Član 9**  
**(Kontrola obračuna i uplate doprinosa)**

Za kontrolu obračuna i uplate doprinosa, naplatu, obračun kamate, kazne i zastare primjenjuju se odredbe Zakona o Poreznoj upravi Brčko distrikta BiH.

**Član 10**  
**(Završna odredba)**

Donošenjem ove odluke, stavlja se van snage Odluka o osnovici i doprinosu za zdravstveno osiguranje, broj: 0-02-022-172/02 od 19. i 23. jula 2002. godine, objavljena u Službenom glasniku Brčko distrikta BiH, broj: 11/02.

**Član 11**  
**(Stupanje na snagu)**

Ova odluka stupa na snagu danom donošenja i objavit će se u Službenom glasniku Brčko distrikta BiH.

Broj: 01-02 -167/09  
Brčko, 16. decembra 2009. godine

PREDSJEDNIK  
SKUPŠTINE BRČKO DISTRIKTA BiH

**Mirsad Đapo, dipl. pravnik**

Dostavljeno:

1. Predsjedniku
2. Potpredsjedniku
3. Gradonačelniku
4. Odjeljenju za zdravstvo i ostale usluge
5. Fondu zdravstvenog osiguranja Brčko distrikta BiH
6. Sekretarijatu Vlade – Sektoru za opće poslove
7. Sekretarijatu Vlade – Sektoru za pravne poslove
8. Arhivi

